

Phawuloosi Teselonqe Asaas Xaafida Nam7antho Kiita Gaatha Qofa

Kiristoosa nam7antho yuussaa bolla dendida oyshoy palama medhida gisho, Teselonqe woosa keethan metoy dari dari bis. Phawuloosi Teselonqe asaas xaafida nam7antho kiitay, “Godaa yuussaa gallasay matis” giya ammano timirtiya bolla minthidi odees. Phawuloosi odishe, Kiristoosi yaanape sinthe, “Geella ura” geetetiya “Kiristoosa ixeysi kaaalethin, ha alamiya bolla iitatethinne geellatethi darishe baana” yaagidi enta ammanuwa suurisees.

Hawaarey, metoyne waayey darikoka, enti banta ammanuwan minnanaada, banta duusas koshshiyaba demmanaw minnidi oothana melanne lo77o ooso oothanaw guye goonna mela enta minthidi zorees.

Maxaafa Ayfe qofata

Gelo qofa (1:1-2)

Godaa yuussanne suure pirda (1:3-12)

Goday yaana (2:1-12)

Ammanetada de7a (2:13-17)

Woossite; minnidi oothite (3:1-15)

Sarothonne anjo (3:16-18)

¹ Phawuloosi, Sillaaseynne Ximotiyoosi Teselonqe woosa keethan de7iya, Xoossaa Aawabanne Godaa Yesuus Kiristoosaba gidida asaas xaafetida kiita.

² Xoossaa nu Aawapenne Godaa Yesuus Kiristoosape aadho keehatethaynne sarotethay hintew gido.

Kiristoosi Simmiya Wode

³ Nu ishato, hinte ammanoyenne hinte issoy is-suwanne harata siiqiya siiqoy daro dicciya gisho, nuuni hessas Xoossaa ubba wode galatanaw bessees.

⁴ Hintena gakida goodaninne waaye ubban gencaninne ammanon minnidi eqida gisho, nuuni nu huuphen Xoossaa woosa keethatan hintebaa markatishe hintenan ceeqetoos.

⁵ Hinte iya gisho gidi meto ekiya Xoossaa kawotethaas besseyisata gididi taybetana mela Xoossaa xillo pirdaas haysi malla.

⁶ Xoossay tuma pirdaa pirdana. Xoossay hintena waayseysata bolla waaye ehana.

⁷ Goday Yesuusi ba wolqaama kiitanchotara, tama lacora salope yaa wode waayetiya hintennanne nuna shempisana.

⁸ Qassi Xoossay bana eronnaysatanne nu Godaa Yesuus Kiristoosa Wongelas kiitetonayisata pirdana.

⁹ Enti Godaa sinthafenne iya bonchuwa wolqaafe shaaketidi merinaa dhayuwan pirdetana.

¹⁰ He gallas, I ba geeshsha asaaninne bana ammaniya ubban bonchetanawunne sabetanaw yaa wode nu hintew odida kiitaa hinte ammanida gisho, hinte iya boncheyisata gididoninne sabbeyisata gididon daana.

¹¹ Nuuni hintew ubba wode Xoossaa woossey hessasa. Nu Xoossay hintena xeeqida de7uwas besseyisata gididi taybetana mela nuuni woossoos. Hinte lo77oba oothanaw amotiya amuwanne hinte ammano oosuwa I ba wolqan polo.

¹² Hessian nu Xoossaanne nu Godaa Yesuus Kiristoosa aadho keehatethan, Godaa Yesuusa sunthaa hinte bonchana; hintenaka I bonchana.

2

Geella Ura

¹ Nu ishato, nu Godaa Yesuus Kiristoosa yu-ussabaanne nu iyara gahetanaw shiiqanabas nu hintena woossoos.

² Tinbiten woyko hara asape si7ida qaaan woyko nuupe ekida kiittada oothidi, “Godaa gallasay gakis” gidi hinte wozanay dagammofonne waabaqopo.

³ Hintena oonika ay ogenka balethofo. Kasetidi geellatethay qonconnanne dhayoy bessiya geella uray yoonna de7ishin, Godaa gallasay gakena.

⁴ Asi goyinniyabanne xoossayaba ubbaa I ix-ananne bana dhoqu oothana. Hari attoshin, Xoossa keethi geli uttidi, “Taani Xoosse” gaana.

⁵ Taani hintera de7ashe hintew odidaysa akeekeketii?

⁶ I ba gallasan yaanape attishin, ha77i yaanaysa aybi iya teqiyako hinte ereeta.

⁷ Asaas qonciboonna geellatetha xuura wolqay ha77ika oothees, shin ha77i iya teqeysi de7ees. Iya teqeysi ogepe kichana gakanaw I qoncenna.

⁸ Hessafe guye, geella uray qoncana, shin Godaa Yesuusi ba doonape keyiya shempuwan, ba boncho yuussan iya wodhana.

⁹ Geella uray, Xalahe wolqan yidi wordo malaatatanne malaalsiyabata oothana.

¹⁰ Hessadaka, dhayos de7iya asata dumma dumma cimmiya iita ooon balethana. Enti dhayiday ashshiya tumaa dosidi ekonna ixida gishosa.

¹¹ Hessa gisho, enti wordo gidiyaba ammanana mela Xoossay wolqaama baleso enta bolla yeddana.

¹² Hessika, tumaa ammanonna asati, nagara ooon ufayteysati ubbay pirdetana melasa.

Ammanthiya Asi Gida

¹³ Goday dosiya nu ishato, nuuni Xoossaa hinte gisho, ubba wode galatanaw bessees. Hinte atana mela Xoossay Geeshsha Ayyaana wolqan hintena geeshshidaysanne hinteka tumaa ammanidaysan I hintena bayrada dooris.

¹⁴ Xoossay, nu hintew odida Wongela baggara hintena xegiday, hinte nu Godaa Yesuus Kiristoosara issife bonchetanaasa.

¹⁵ Hiza, nu ishato, minnidi eqite. Nuuni hintena nu doonan gidin woyko dabdaabiyan gidin tamaarsida timirtiya oykite.

¹⁶⁻¹⁷ Xoossay nu aaway nuna dosees. I nuus keeha; I merinaa minthethonne lo77o ufaysaa nuus immis. Hinte ubba wode lo77oba oothanawunne odetanaw minthethana melanne maaddana mela nu Godaa Yesuus Kiristoosanne Xoossaa nu aawa woossoos.

3

Nuus Woossite

¹ Wursethan nu ishato, Godaa qaalay hinte gid-don ellesidi dalganaadanne bonchetanaada nuus woossite.

² Hessadaka, asi ubbay qaala si7idi ammanonna gisho, Xoossay geellatapenne iita asatape nuna ashshana mela nuus woossite.

³ Shin Goday ammanetidaysa; I hintena minthethananne Xalahepe naagana.

⁴ Nuuni hintena kiitteysa ha77ika sinthafeka hinte oothanaysas Godan nuuni ammanetoos.

⁵ Goday hinte wozanaa Xoossa siiquwakonne Kiristoosa danda7aako kaaaletho.

Boozopite

⁶ Nu ishato, hinte nuupe ekida kiitaa kaallon-aysatapenne ooso billiya azalla ammaniya asatape hinte shaaketanaada Godaa Yesuus Kiristoosa sunthan hintena kiittoos.

⁷ Nuuda hanidi daanaw besseysa hinte, hinte huuphen ereeta. Nuuni hintera de7iya wode ooso billibooko.

⁸ Nuuni oodefeka kathi mela mibooko. Nuus danda7etida mela qammanne gallas oothi daaburidi de7idape attishin, oodeska tooho gidibooko.

⁹ Nuuni hessa oothiday, hintew leemiso gidanaasafe attishin, hintefe maade oychanaw nuus maati dhayina gidenna.

¹⁰ Nu hintera de7iya wodeka, “Oothanaw koy-onna asi oonika moopo” yaagidi kiitida.

¹¹ Nuuni hessa giday, hinte gidдон issi issi azalati de7eysa si7ida gishosa. He asati gelsonnaban

gelidi harata ooso bilisoosonape attishin, aykoka oothokona.

¹² Nuuni hessa mela asati maara de7o daanadanne bantana koshshiyaba oothidi demmanaada Godaa Yesuus Kiristoosa sunthan enta kiittoosinne zoroos.

¹³ Shin nu ishato, lo77o ooso oothanaw azallofite.

¹⁴ Ha77i nuuni ha dabdaabiyan kiitida kiittas kiitetonna asi oonika de7iko he uraa erite. I yeel-latana mela iyape shaaketite.

¹⁵ Shin iya ishada seeritepe attishin, morkeda xeellofite.

Sarotho

¹⁶ Saro immiya Goday, ba huuphen hintew ubba wodenne ubba baggara saro immo. Goday hinte ubbaara gido.

¹⁷ Taani Phawuloosi, ha kiitaa ta kushen xaafas. Ta kiita ubbaas mallay haysa; taani hessada xaafayis.

¹⁸ Nu Godaa Yesuus Kiristoosa aadho keehatethay hinte ubbaara gido.

Geeshsha Maxaafa
Gofa: Geeshsha Maxaafa (Bible) for Ethiopia, Latin
script

copyright © 2024 The Word for the World International

Language: Goofa (Gofa)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

cd247997-ca42-596b-9d91-94ffba4675ef